

2011

Bridge klub Sarajevo

Ranko Tica

[OTVOR 1NT – JACOBY TRANSFER]

U dokumentu je obrađen osnovni razvoj licitacije na otvor 1 NT sa korištenjem Jacoby transfera. U prvom dijelu dokumenta dat je generalni princip uvođenja Jacoby transfera a u nastavku je dat pregled svih promjena u osnovnom sistemu licitacije na otvor 1 NT nakon uvođenja Jacoby transfera. U drugom dijelu ovog dokumenta obrađen je sistem slem licitacija na otvor 1 NT i uvedene Blackwood i Gerber konvencije. Na kraju dokumenta je data rekapitulacija razvoja licitacije na otvor 1 NT nakon uvođenja Jacoby transfera.

SADRŽAJ

| | |
|-----------------------------------------------------|---|
| RAZLOZI UVOĐENJA JACOBY TRANSFERA..... | 2 |
| JACOBY TRANSFER | 3 |
| Generalni pristup | 3 |
| Nastavak licitacije na Jacoby transfer | 3 |
| Šta se mijenja nakon uvođenja Jacoby transfera..... | 4 |
| Slem invit licitacije | 4 |
| Slem licitacije nakon otvora 1 NT..... | 4 |
| Blackwood 4NT | 5 |
| Gerber 4 ♣ | 5 |
| REKAPITULACIJA LICITACIJE NAKON OTVORA 1 NT | 7 |

RAZLOZI UVOĐENJA JACOBY TRANSFERA

Ako nakon otvora 1NT u listu imamo dugu boju, tada je, bez obzira na broj poena, kontrakt u toj boji sigurniji od onog u bezadutu. To se posebno odnosi na listove sa 0-7 poena iako vrijedi i za listove sa više od 8 poena.

Pogledajmo slijedeće primjere:

- | | | |
|---------------------------------------|--------------------------------------|---------------------------------------|
| 1. ♠ Kxxxx ♥ xxx ♦ xx ♣ xxx | 2. ♠ Jxx ♥ Axxxxx ♦ xx ♣ xx | 3. ♠ Jx ♥ xxx ♦ Qxxxxxx ♣ x |
| 4. ♠ Kxxxx ♥ Ax ♦ Q10x ♣ xxx | 5. ♠ KJxxxx ♥ Ax ♦ xx ♣ xxx | 6. ♠ xxx ♥ A10xxx ♦ KQx ♣ Kx |

Jasno je da je sa listom u primjeru 1. bolje igrati 2 ♠ nego 1NT. Isto tako u primjeru 2. je bolje igrati 2 ♥ nego 1 NT, a u primjeru 3. je bolje igrati kontrakt u ♦ nego u 1NT.

Takođe sa listom 4. bolje je da partner zna da imamo 5 ♠ prije nego ga invitiramo sa 2 NT na manšu. Nakon toga će otvarač lakše odlučiti da li da igra 2NT, 3 NT, 3 ♠ ili 4 ♠. Sa listom u primjeru 5. bilo bi dobro da otvaraču možemo nekako saopštiti da imamo 6 karata u ♠ boji i list sa 8-9 poena. Završni kontrakt (3 NT, 3 ♠ ili 4 ♠) će onda odlučiti otvarač. Isto tako sa listom u primjeru 6. dobro bi bilo da otvaraču najprije saopštimo da imamo 5 karata ♥ prije nego skočimo u 3 NT kako bi on lakše odlučio šta je bolji kontrakt (3NT ili 4 ♥).

Prethodni primjeri ukazuju na činjenicu da je i sa slabim listovima 0-7 poena kao i sa jačim listovima sa 8 i više poena ukoliko imamo jednu ili čak možda dvije 5 i više karatne boje bolje igrati kontrakt u adutu nego u bezadutu i da treba naći efikasan način da se ta informacija saopšti otvaraču.

Takođe, treba uzeti u obzir činjenicu da je u bridgu bolje da izvođač bude igrač koji ima bolji list (više poena). Razloga za to je više ali su dva osnovna:

- U slučaju da je izvođač igrač sa više poena (otvarač 1NT) atak će izvoditi igrač koji je lijevo od njega tako da će atak *dolaziti prema njemu*. To je za igrača koji je na ataku otežavajuća okolnost i vrlo često će rezultirati ostvarenjem dodatnog štihla za izvođača jer atak dolazi u njegove potencijalne „makaze“.
- Ako je izvođač igrač sa jačim listom (otvarač 1NT) na stolu (dummy) će biti slabiji list. Na taj način igrači u odbrani će dobiti manje informacija jer će jake karte biti skrivene u ruci izvođača.

Uzimajući u obzir prethodne činjenice u bridge praksu je uvedena jedna konvencija koja omogućava ostvarenje prethodnih ciljeva:

- Da se igra kontrakt u adutu umjesto u bezadutu kada partner otvarača ima dugačku boju na otvor 1NT
- Da igru izvodi igrač sa jačim listom

Konvencija koja omogućava ispunjavanje ova dva cilja zove se **Jacoby transfer**.

JACOBY TRANSFER

GENERALNI PRISTUP

Jacoby transfer se koristi na otvor 1 NT sa listovima svih snaga ako posjedujemo jednu ili dvije 5 i više karatnih boja.

Da bi se zadovoljila oba bridge principa navedena u uvodu Jacoby transfer se temelji na konvenciji po kojoj ne licitirate boju koju imate već boju ispod nje. To znači da kada imate dugu boju ♥ licitirate ♦, kad imate boju ♠ licitirate ♥, a kad imate minorsku boju ♣ ili ♦ licitirate ♠.

Generalna pravila korištenja Jacoby transfera na otvor 1 NT su slijedeća:

- S dugom herc bojom licitiramo 2 ♦ (transfer za herc)
- S dugom pik bojom licitiramo 2 ♥ (transfer za pik)
- S dugom tref ili karo bojom licitiramo 2 ♠ (transfer za minore)

NASTAVAK LICITACIJE NA JACOBY TRANSFER

Otvarač je obavezan da prihvati transfer odnosno da licitira našu boju: 2 ♥ nakon govora 2 ♦, odnosno 2 ♠ nakon govora 2 ♥ i 3 ♣ nakon licitacije 2 ♠.

Jacoby transfer se iznimno koristi kao transfer za minorske boje (jedan od takvih slučajeva je dat u primjeru 3.). Razlog je činjenica da poslije Jacoby transfera moramo minorsku boju igrati na nivou 3 umjesto 1 NT. Na licitaciju 2 ♠ (transfer za minorsku boju), otvarač je dužan da licitira 3 ♣, nakon čega ako imate dugu ♣ boju pasirate a ako imate ♦ boju licitirate 3 ♦. Primjetite da je ujedino i to jedini slučaj kada će izvođač biti igrač sa slabim listom a ne otvarač.

Napomenimo još jednom da se Jacoby transfer koristi i za slabe listove (0-7) poena kao i za invit listove 8-9 poena i za jake listove 10 i više poena kod partnera otvarača.

Sa slabim listovima 0-7 poena partner otvarača će nakon prihvaćenog transfera od strane otvarača pasirati (odnosno licitirati 3 ♦ sa slabom karo bojom na otvaračev odgovor 3 ♣).

Sa invit listovima 8-9 poena partner otvarača će nakon transfera:

- Licitirati 2 NT sa 5 karatnom majorskom bojom u kojoj je transfer napravljen ili
- Licitirati svoju majorsku boju na nivou 3 nakon prihvaćenog transfera da bi otvaraču dao do znanja da ima 6 karata u boji

Sa jakim listovima 10+ poena partner otvarača će na prihvaćeni Jacoby transfer licitirati:

- 3NT sa 5 karatnom majorskom bojom, što će otvarač pretvoriti u 4 u majoru ako ima podršku od 3 karte minimalno ili
- Licitirati manšu u svojoj majorskoj boji ako ima 6 i više karata.

ŠTA SE MIJENJA NAKON UVOĐENJA JACOBY TRANSFERA

Uvođenjem Jacoby transfera mijenjaju se neke od osnovnih licitacija partnera otvarača na otvor 1 NT. Da probamo da rekapituliramo sve promjene:

- Sa slabim listom 0-7 poena i dugom bojom ne licitiramo svoju boju na nivou 2. već koristimo Jacoby transfer. Jacoby transfer omogućava da se i slabi listovi sa tref bojom igraju u toj boji umjesto 1 NT.
- Sa invit listovima 8-9 poena i dugom majorskom bojom (5 i više karata) ne licitiramo odmah 2 NT kao invit već najprije iskoristimo Jacoby transfer i zatim licitiramo 2 NT ili 3 u toj boji sa 6 karata. Time otvaraču dajemo više informacija za donošenje konačne odluke.
- Sa listovima snage 10 i više poena i 5 karata u majorskoj ne licitiramo 3 u toj boji, već koristimo Jacoby transfer a nakon njega licitiramo 3 NT što otvarač može da pretvori u manšu u tom majoru ako ima podršku ili ostavi 3 NT ako nema.
- Sa listovima snage 10 i više poena i 6 karatnom majorskom bojom ne licitiramo odmah manšu u toj boji već licitiramo najprije Jacoby transfer a zatim manšu u toj boji, čime omogućavamo da izvođač bude otvarač (koji ima jaču ruku).

SLEM INVIT LICITACIJE

Ove izmjene koje je uslovilo uvođenje Jacoby transfera ostavile su sada slobodne licitacije na 3 nivou direktno nakon otvora 1 NT. To nam daje mogućnost da poboljšamo i dopunimo naš sistem licitacije i da te licitacije direktno na 3. nivou nakon otvora 1 NT iskoristimo za situacije kada imamo 13 i više poena i 5 i više karata u nekoj boji, koje se nakon otvora 1 NT smatraju sada kao invit licitacije za slem.

Recimo to mi mogle biti ruke sa slijedećim listovima:

| | | |
|------------|---------|----------|
| 1. ♠ KQxxx | 2. ♠ Kx | 3. ♠ QJx |
| ♥ Ax | ♥ AQxxx | ♥ Ax |
| ♦ xx | ♦ Axx | ♦ KQJxxx |
| ♣ AKxx | ♣ KJx | ♣ Ax |

Znači skok na nivo 3 nakon otvora 1 NT označava jednobojan list koji ima 13 i više poena i koji predstavlja invit (poziv) za igranje slema. Otvarač će licitirati 3 NT ako nema podršku od 3 karte u toj boji, a sa podrškom će licitirati partnerovu boju.

SLEM LICITACIJE NAKON OTVORA 1 NT

Da bi se napravio slem u bezadutu, potrebno je u oba lista imati barem 33 poena. Slem u adutu moguće je napraviti i sa manje poena ukoliko list ima distributivne vrijednosti (jako dugu boju, dvije duge boje, singl ili šiken u sporednim bojama).

Slem bez dva asa je moguće napraviti samo ako u listu posjedujemo šiken. Zato je u slučaju da se želi igrati slem potrebno provjeriti broj asova. To se može uraditi na dva načina:

- U slučaju da je pronađen fit nakon otvora 1NT koristi se licitacija 4 NT – Blackwood konvencija koja predstavlja pitanje za asove. Recimo na licitaciju 1 NT – 3 ♥ - 4 ♥ - 4 NT je Blackwood (pitanje za asove).

- U slučaju da je fit poznat već nakon otvora 1NT (imate 6 i više karata u nekoj boji i znate da sa otvaračem imate fit) onda se može koristiti direktan skok u 4 ♣ - Gerber konvencija koja je takođe pitanje za asove.

BLACKWOOD 4NT

Pitanje za asove 4 NT zove se Blackwood konvencija i ona se može koristiti kao pitanje za asova kada je poznata adutska boja (pronađen fit) nakon otvora 1 NT ili nakon bilo kog drugog otvora nakon koga je pronađen fit i kombinovani broj poena kod partnera omogućava licitaciju slema.

Odgovori na Blackwood konvenciju su slijedeći:

Blackwood 4 NT

| | |
|------|-------------|
| 5 ♣: | 0 ili 4 asa |
| 5 ♦: | 1 as |
| 5 ♥: | 2 asa |
| 5 ♠: | 3 asa |

Nakon upita za asove ako ste zadovoljni odgovorom vašeg partenara, što znači da vam ne nedostaje više od 1 asa ili možda imate sve ali nemate interesa za veliki slem onda direktno na odgovor licitirate taj slem na nivou 6. U slučaju da nemate sve asove ili vam nedostaje više od 1 asa i da ne želite igrati slem licitacija se nakon odgovora na 4 NT može završiti sa licitacijom dogovorene adutske boje na 5 nivou (ako je moguće) i ta licitacija predstavlja sign-off licitaciju. Zato budite oprezni sa licitacijom 4 NT ako vam neki odgovor na 5 nivou koji je viši od vaše dogovorene boje nije dovoljan da igrate mali slem, jer ćete ga ipak morati igrati pošto je vaša dogovorena boja u tom slučaju odgovorom na upit za asove preskočena i ne možete se više zadržati na 5 nivou.

Nakon upita za asove licitacija slema se može nastaviti sa upitom za kraljeve samo u slučaju da obje ruke kombinovano imaju sve 4 asa i ako se želi igrati veliki slem. Upit za kraljeve je 5 NT. Odgovori su slični kao i kod upita 4 NT:

| Blackwood 5 NT | |
|----------------|----------------|
| 6 ♣: | 0 ili 4 kralja |
| 6 ♦: | 1 kralj |
| 6 ♥: | 2 kralja |
| 6 ♠: | 3 kralja |

GERBER 4 ♣

Pitanje za asove 4 ♣ zove se Gerber konvencija i ona se može koristiti kao pitanje za asova direktno na otvor 1 NT kada je poznata činjenica da imate fit sa otvaračem u nekoj minorskoj boji (najmanje 6 karata u toj minorskoj boji) i 13 i više poena. Odgovori na Gerber konvenciju su slijedeći:

Gerber 4 ♣

| | |
|-------|-------------|
| 4 ♦: | 0 ili 4 asa |
| 4 ♥: | 1 as |
| 4 ♠: | 2 asa |
| 4 NT: | 3 asa |

Postavlja se pitanje zašto se uvodi ova konvencija kao upit za asove kada imate siguran minorski fit na otvor 1 NT i želite igrati slem? Odgovor leži u činjenici da vi imate 6 i više karata u toj minorskoj boji i da znate da imate fit sa otvaračem jer on mora imati najmanje 2 karte. Pored toga da bi pokazali partneru da želite igrati slem u tom minoru morali bi licitirati 3 u tom minoru kao što smo ranije već rekli. Licitacijom minorske boje na 3 nivou bi oduzeli mogućnost da otvarač izvodi kontrakt. Drugim riječima nemate nikakvu posebnu prednost licitacije na 3 nivou te minorske boje jer ćete bez obzira da li partner pokazao 3 karte u vašoj boji (podržao vašu boju) ili možda 2 karte (licitirao 3 NT) vi biste u svakom slučaju krajnji kontrakt smjestili u toj svojoj dugoj minorskoj boji i vi biste bili izvođač.

S druge strane licitacija 3 u minorskoj boji nosi i opasnost da vas partner podrži licitirajući vašu minorsku boju na 4 nivou. Time biste bili osuđeni na koristite 4 NT – Blackwood konvenciju za upit za asove koja zbog svoje strukture odgovora ima veliku šansu da odgovor vašeg partnera bude za vas nepovoljan a da istovremeno na 5 nivou preskoči vašu minorsku boju. Time biste se izložili riziku da igrate slem bez recimo 2 asa.

Postavlja se i drugo pitanje zašto se Gerber konvencija ne koristiti i kao upit za asove i za majorske boje? Odgovor leži u činjenici da sa majorskim jakim rukama sa kojima želite igrati slem imate mogućnost jednostavnog Jacoby transfera na 2 nivou te nakon toga skok u 4 NT čime biste otvarača 1 NT smjestili kao izvođača kontrakta a s druge strane nema opasnosti da će odgovori na Blackwood preskočiti vašu dogovorenu majorsku boju na 5 nivou.

REKAPITULACIJA LICITACIJE NAKON OTVORA 1 NT

| 1.Odgovori partnera i nastavak licitacije | |
|-----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|------------------------------------------------------------------------------------------------------------------------------------------------------------------------------------|
| Pass | 0-7 poena, obično bez 5 karatne majorske ili 6 karatne minorske boje |
| 2 NT | 8-9 poena i balansiran list. Poziv na manšu ako je otvarač maksimalan. |
| 3 NT | 10-15 H poena i balansiran list. Stop licitacija. |
| 4 NT | 16-17 H poena i balansiran list. Kvantitativni poziv za slem. Otvarač pasira sa 15 poena, licitira 5 NT sa 16 H poena i licitira 6 NT sa 17 H poena. |
| 2 ♣ | Stayman konvencija. Minimalno 8 poena. Pitanje za 4 karatne majore. |
| 2 ♦, 2 ♥ | Jacoby transfer - majorski. List bilo koje snage, minimum 5-karatna majorska boja. Otvarač mora bezuvjetno licitirati traženu boju. |
| 2 ♠ | Jacoby transfer – minorski. List sa 0-7 poena i 6-karatna minorska boja. Otvarač mora licitirati 3 ♣ što njegov partner pasira ako mu je boja ♣ ili licitira 3 ♦ ako mu je boja ♦. |
| 3 ♣, 3 ♦, 3 ♥, 3 ♠ | Jednobojni list sa slem ambicijama i 13 i više poena. |
| 4 ♣ | Gerber konvencija – direktno pitanje za asove. List sa 6 i više karata u minorskoj boji i 13 i više poena. |
| 2.Odgovori na Stayman konvenciju | |
| 2 ♦ | Bez 4 karatnih majorskih boja |
| 2 ♥ | 4 -karte ♥ i moguće 4 karte ♠ |
| 2 ♠ | 4 – karte ♠ bez 4 karte ♥ |
| Nastavak licitacije partnera otvarača: <ul style="list-style-type: none"> - 2 NT – poziv za 3 NT ako je maksimalan - Licitacija odgovorenog majora na nivou 3 – poziv na manšu ako je otvarač maksimalan - Licitacija manše u majoru. Stop. - Licitacija 3 NT na 2 ♥ - hoću da igram manšu, ako imaš pika licitiraj 4 ♠ inače pasiraj. | |
| 3.Razvoj licitacije na Jacoby transfer | |
| Na licitaciju 2 ♦ (Jacoby transfer za ♥) otvarač odgovara 2 ♥, a partner otvarača nakon toga može da licitira: | |
| Pass | Slab list 0-7 poena sa ♥ bojom |
| 2 NT | 5-karatna ♥ boja sa 8-9 poena. Invit za manšu. |
| 3 ♥ | 6-karatna ♥ boja sa 8-9 poena. Invit za manšu. |
| 3 NT | 5-karatna ♥ boja sa 10-12 poena. Balansiran list |
| 4 ♥ | 6-karatna ♥ boja, bez interesa za slem. Stop licitacija. |